

知  
足  
齋  
文  
集

知足齋文集卷第三

大興 朱珪 石君

墓誌銘

衢州府知府林君墓誌銘

林君穆菴卒之明年其弟明佐迎喪來京師請其同年友朱珪爲之狀且請銘以歸誌其墓珪惟不能爲古文辭懼不足以表吾穆菴而義又不可辭乃以狀屬之家兄竹君而珪誌之君姓林氏諱明倫穆菴其號也先世自漳浦遷廣東之始興傳十世爲君祖先瑋貤贈儒林郎翰林院庶吉士加一級生高品君之父也封儒林郎

翰林院庶吉士加一級君少好學初授左氏傳輒以意首尾聯綴之作數十大篇以觀其文章事跡之終始蓋己有志于爲古文乾隆十二年君年二十有五舉于鄉明年成進士改庶吉士時同年官翰林者建寧朱仕琇業古文君居館中日與之劘礱以爲揚雄韓愈復出不易也居三年仕琇外授去君獨深思古文所以明道不如求其本乃盡讀宋五子之書而反之孔曾以爲確然獨有得也時其心所可者與之言不則噤然同年安平陳慶升金匱秦朝鈺兩人最心折之而珪好與之辨論穆菴不拒也十七年冬授編修明年記名以御史用秋

奉

命主山東鄉試時仕琇以夏津令充同考官以故所錄文往往有古法十九年夏出知衢州府君之治衢也決然以教化爲必可行以禮一民之吉凶賓祭不得妄有期會衢俗婚則招搖酌飫于道誇豐嗇相閔喪事以布帛賄弔客梵唄闐鉤歲春秋奔走輳九華媚神求福祿者皆一切厲禁之修正誼書院間則至講堂進諸生而牖之曰士民之倡也太守士之師也士而不學學而詐乎聖賢之志者太守恥之初衆未信久而翕然曰太守愛我太守賢終其罷去迄今衢之人必曰林太守賢歲

旱君爲文禱于仙霞嶺及所爲石將軍者曰知府有罪旱魃殛我無虐我民已而果雨郡或有雨雹災則親徧視鄉縣計畝戶上報無漏嗚呼君所爲盡心于教化誠于愛民者歟然君性介而多恥見上官則啞貌不似能吏二十一年冬遂以才力不及奏罷去例降調者當引見其明年秋來京師君舊有咳血疾至則病甚遂卒前卒之日珪往褰其帷視之張目曰死矣命也無他言顧其僕下帷若不忍視予者嗚呼可傷也已明日五更珪當朝別去朝罷趨而往哭之于牀蓋君以夜半死矣君初來時珪夢獨騎而過君至門則聞君死入哭

之君蹶然生瞪目視予珪心惡之是日也珪急獨騎而往哭君視之瞪目如夢翼夜珪手斂君視之終不瞑嗚呼可哀也矣貧無以治喪發其裝官翰林時弊衣數襲而已守三年乃不增一衣嗚呼若君者可謂廉矣君來時珪固索觀其文許諾未出示予比君死而得盡讀之然後知君之于文幾乎道不悖于古也君卒一月而仕琇以改教來京師刻其古文朝鈔爲之傳君淡目而削下多眉鬚廉靜猥潔勇于自任于道未知其所至然其志決不爲僞君之言曰行百里者至則倦焉非執也志在百里行千里者未至則不止焉非勅也志在千里

然則君所謂有千里之志者惜乎其死也君生于雍正元年癸卯七月十一日卯時卒于乾隆二十二年丁丑十月十五日某時年三十有五娶張恭人生子洛淳淳爲君弟明回後女子一君著有學庸通解讀書邇言古文詩制義若干卷將以某年月日葬于某所銘曰

孰強其志而弱其躬嗇于厥年聞道則豐死而克存視此幽宮

太常寺少卿鄭公墓誌銘

公諱其儲字又梁一字虛齋姓鄭氏荆之石首人其先出漢鄭柱南宋嘉泰間進士冲霄公者卒官江陵葬于

石首其子淑濟公遂家焉世有德鄉里至公考飛雲公  
贈中憲大夫有六子公其次也少爲名諸生年二十七  
舉康熙辛卯鄉試壬辰成進士改庶吉士癸巳授檢討  
辛丑會試充同考官得邵中丞基盧運使見曾等

世宗初元改授戶部山東司郎中絕請謁介然不阿夔  
賸就理三年擢工科給事中丙午奉

命主四川鄉試請假省親使竣歸及夔聞母袁蒸人赴  
明年丁父艱克盡哀禮己酉服闋庚戌授四川松茂道  
參議縣州水壩顧廷璋寧壩楊元石馬壩李重吉等掠  
借穀麻務畝債張大吏檄公往治之公廉得民饑先發



貸倉穀安行密捕擒其魁至則帖然時方亢旱公虔禱齋祓日卓午仰額忽有雲隱隱心敏益慤少頃雨三日歷禱芻縣皆應氓雜跽泥潦中送迎公呼聲載路蓋公生平以誠治己其他改類然甲寅奔生母胡恭人喪

今上乾隆戊午擢太常寺少卿庚申轉大理寺卿遷左僉都御史明年改順天府府丞丞治京師校士事公刷剔浮籍寄姓以端始進每科歲郡試衡文拔才勤勤如不及丁卯又轉太常寺少卿己巳致仕歸越五年終于家配陳恭人孝謹儉勤生子二家謨家語俱太學生女四孫男二謨生永常語生永琳公生于康熙二十四年

乙丑七月十七日辰時卒于乾隆十九年甲戌二月十八日巳時壽七十陳恭人之生後公十日于公之歿年九月三日卒乾隆三十三年某月某日合葬于縣之南鄉彭田岡公官少京兆時歲乙丑珪年十五應府試公首擢之期以國士兄垣筠皆辱公知時冬月公來予家坐廳事先君命予兄弟出謁公大詫曰君柰何凍裂吾莊先君愕然公徐曰此三進士吾三莊也速衣之裘先君笑諾珪自是乃得服羊裘及歲丁亥公歿十四年矣珪司臬楚北明年乃助公葬而銘公藏銘曰  
誠澤民明擇人銘公德礪余身以脉其後昆

孫母張太夫人墓誌銘

興縣孫文定公立身立言立朝爲名宰相人仰望如天  
斗地嶽珪嘗一親炙公溫然其易肫然其仁巨儒也其  
後公歿珪與公仲子廉使孝愉同官于閩讀公遺文拜  
公之夫人于堂雍雍儉勤然後歎公之修身齊家教澤  
純厚不愧乎古人也及哭廉使君陽曲之南郊弔太夫  
人于旅次哀傷之餘神明清穆非中有定主者曷能閑  
常變而不亂乃知太夫人眞文定公配也越三年太夫  
人考終于家孤子孝則以行狀來請爲銘不敢辭太夫  
人姓張氏父彪山西鎮西衛城守備年二十五歸文定

公爲繼室撫元配原太夫人之二女暨側室李太君之  
子孝懿孝則如所生佐文定公孝于舅侍疾送終哀敬  
盡禮從宦中外治內政井井教子孝愉必以正當廉使  
君監司汀漳擒治亂民有功調臺灣道

上念其母老

特旨畱內地卽授閩臬以官犯自裁發軍臺效力

上以文定公暨太夫人故免其役改官部曹未幾擢直  
隸臬司病卒

上聞之歎息詢問太夫人狀蓋

天子推恩舊輔體臣教孝惟文定公之忠誠協

帝心而太夫人動必以禮盛衰不渝實有敬姜之賢爲  
不可及也太夫人生于康熙三十六年九月二十一日  
卒于乾隆三十七年五月六日壽七十有六

誥封一品夫人子三長孝懿次孝愉俱先卒三孝則孫  
五孝則之子鎮鑾暨鏞孝愉之子銓鑄某年月日合葬  
于文定公之阡銘曰

澣濯服勤婦功朝暮哭禮所宗三立不朽真相公石樓  
蔚汾清峻同千年此藏康幽宮

提督四川等處總兵官領隊大臣諡莊節馬公墓

誌銘

公諱全陽曲人初名瓌姓馬氏字具堂號純齋曾大父  
化龍大父驥驥生雲翔雍正甲辰進士官至參將有四  
子瑤瑒其三公季珮三世皆以公貴

詒贈振威大夫江南提督初公考爲陝西孤山守備時  
梁夫人姪公或夢開牙迎上官乘軒入已而公生早疑  
疑出頭角授孝經嘉誦始于事親三言乾隆十三年大  
兵征金川公年十七從父于軍父卒與兄瑤以喪歸葬  
應募西安軍門乾隆壬申連雋

賜一甲第三人及第授二等侍衛出爲福建撫標右營  
遊擊公年未壯與同官靳搢不相下俱劾去旣而幡然

折節更名曰全至京師入伍巡捕營傅文忠公奇其才  
乃以兵試己卯庚辰再捷

上御 紫光閣親校進士識公曰爾馬瓌耶何以至此  
公叩首引罪而技故絕人

上大悅

賜第一人自古科甲之奇一身再及第而名益歸未有  
如公者也授頭等侍衛二十七年扈

駕江南授南昌鎮總兵官

賜花翎三十年移鎮蘇松駐崇明巡海島登羊山姦宄  
迹三十四年擢江南提督三十七年冬調甘肅提督

復雷江南入

覲時方討金川公請行

上可之

賜元狐馬褂加領隊大臣馳驛赴軍三十八年二月抵  
控喀營每戰輒克殺賊二百餘攻獲昔嶺木果木棚樓  
數十

賜荷包四功牌一是時大軍駐木果木險與賊倚夏五  
月公遣兄子國錡歸曰告汝父善事我母我無以家爲  
矣六月十一日賊証公大呼殺賊于昔嶺死之時有  
命調四川提督而公死事聞

上震悼卹典有加世襲騎都尉又一雲騎尉



賜祭葬

御文勒碑

予諡莊節入祀昭忠祠公生雍正十年壬子三月二十九日卯時殉事時年四十有二生平忠孝友弟沈勇有大略或驚其兩起家冠倫魁而勳業不竟其年爲憾而不知公之獲死所歸列星可爲完人而無愧也配段夫人子四國銳襲職騎都尉又一雲騎尉授都司發山西委用國綱爲公弟後國鍵國鑑乾隆四十年三月二十五日葬于陽曲城東水峪邨先人之阡國銳乞銘于珪珪不獲辭銘曰

嗚呼癸巳孟陬遇公王胡隆角高鳩聃耳方矚嗟偉丈  
夫甲第巖巖雄魂殷鬚公平曷盱晉山牙牙豐碑龍掣  
歸復在天不磨不渝

翰林院編修

誥授中議大夫前

日講

起居注官翰林院侍讀學士加二級先叔兄朱公  
墓誌銘

珪自去年八月十四日聞予兄竹君之病狀于汀十六  
日忽得凶耗哭失聲旣而得姪錫卣等所爲行述且曰  
明春將葬季父其爲銘嗚呼已矣悔珪不從兄學古文  
而何以銘吾兄耶公諱筠字竹君一字美叔號筍河順

天大興人先世德三公居浙蕭山之黃閣河當明洪武時德三公之曾祖福三公元初居越寨自上無徵矣由德三公而下皆葬西山世業農八世至高祖諱尙綱公明末官遊擊亦不詳其地曾祖諱必名祖諱登俊起家湖廣長陽四川琪縣知縣終于中書科中書舍人考諱文炳年十七入籍大興爲諸生官陝西盩厔縣知縣累封至中憲大夫福建糧驛分巡福州福寧道曾祖祖考三世皆

誥贈通奉大夫山西布政使司布政使曾祖妣白氏祖妣何氏馮氏妣徐氏皆

贈夫人外王父諱覺民公康熙甲午舉人以珪請貤  
中議大夫翰林院侍講學士加二級外王母史氏貤  
淑人先妣生珪兄弟四人伯兄堂原任陝西大荔縣  
縣丞以珪請貤封中憲大夫 日講起居注官 文

淵閣直閣事翰林院侍講學士加一級仲兄垣辛未科  
進士歷官山東濟陽長清 縣知縣以公請貤贈奉直  
大夫翰林院編修加三級其次公行五珪其季也女兒  
弟六人公生而神慧長珪二歲皆生于盤屋九歲至京  
師十三通五經學爲文十五文成斐然先大夫喜賜之  
硯其年癸亥七月先妣見背公與珪同臥起夜讀古書

手鈔默誦雞鳴不休明年珪遂病而公愈強力乙丑孟冬服除應郡試府丞石首鄭公其儲擢珪第一公稍次偕謁鄭公笑曰是皆美才弟可先兄耶告之學使少司農臨桂呂公熾十二月院試呂公擢公第一試鵬翼搏風歌大奇之徧告諸公明年正月京尹常州蔣公炳邀其同鄉劉文定公綸程文恭公景伊錢文敏公維城今侍郎莊公存與其弟培因設筵召珪兄弟面試劉公授題崑曰雙玉歌詩成諸公驚喜明日皆先來就訪明年珪竊科名而公學日以富庚午鄉試編修秀水鄭公虎文薦公卷不售名益振諸城劉文正公延之家修

京志乾隆十八年癸酉舉于鄉同考官編修建昌饒  
公學曙主考協辦大學士吏部尙書興縣孫文定公嘉  
淦禮部侍郎滿洲嵩公壽明年甲戌中會試式同考官  
贊善溧陽史公奕簪總裁大學士海寧陳文勤公世倌  
禮部侍郎滿洲介公福內閣學士武進錢文敏公維城  
殿試

賜莊培因榜進士出身改庶吉士丁丑散館授編修充  
方略館纂修官辛巳充會試同考官甲申丁先大夫憂  
珪自閩奔喪歸與兄掇首者二年公自爲諸生卽授弟  
子至是從游者數十人丙戌歲紗服闋公欲不出而爲

名山大川游已乞假矣明年正月珪服除詣宮門

召見

上詢家事始知兄名曰編修無定額汝兄已補官不比  
汝需缺也珪未卽對

上曰非耶珪謹唯曰是出則告之翰林院取假是以歸  
曰兄實無疾倘

上再詰不敢欺也強爲弟起公不答旣而听然曰汝敗  
我雅與矣是冬授贊善明年五月

御試二等擢翰林院侍讀學士庭充日講起居注

官戊子科順天鄉試同考官三十四年

欽派協辦內閣學士批本事 己丑科會試同考官庚

寅奉

命爲福建鄉試正考官充辛卯會試同考官至是

上知公淡歲持文柄所得士多著名公益卓然以韓歐陽蘇自任振起古學獎藉寒峻有一善者譽之如不及天下翕然稱之曰竹君先生是秋奉

命視學安徽安徽故有樸學公躬拜奠婺源故士江永汪紱之主祠之鄉賢以勸乃教士曰讀書不可不識字爲刻舊本許氏說文解字揭以四端曰部分字體音聲訓詁又曰稽古莫如金石文可證經史之譌所枉披剔



榛蕪聚至千種時

上方詔求遺書公奏言翰林院庫貯明永樂大典中逸書宜就加採錄

上覽奏異之下軍機大臣議行

御製七言八韻詩紀其事乃

命纂輯四庫全書得之大典中者五百餘部皆世所不傳次第刊布海內實公發之也公又言請倣漢唐故事擇儒臣校正十三經文字勒石太學奉

硃批候朕緩緩酌辦癸巳春仲兄卒其秋以某生欠考事部議降級得

旨朱筠學問尚優加恩授編修在四庫全書處行走比歸總辦日下舊聞纂修事是時金壇于文襄公敏中掌院爲總裁于公直軍機凡館書彙本披覈辨析苦往復之煩意欲公就見而質而公執翰林故事總裁纂修相見于館所無往見禮訖不冝往愛公者強拉公至西園相見公持論侃侃不稍下金壇間爲

上言朱筠辦書頗遲

上不之罪曰命蔣賜榮趣之真

特恩也乙未珪自山西歸復入翰林從容爲公言宜稍和同者公日子亦爲是言耶珪心愧之先是珪與公同

官翰林其車馬者七年至是比鄰居宅後可通往來而伯兄居老屋對門珪自名所居曰鄂不草廬公既久次望益重則大言翰林以立品讀書爲職終歲足不至達官門惟門人好友醞酒必應輒盡醉乃罷聚書至數萬卷種花滿徑來請益者不拒考古著錄窮日夜不劬古文以鄭孔經義遷固史書爲質覩縷鉅細事辨時地真氣勃出成一家言賦則陽張陰闞馬揚以下不道也前後遇 大典禮告成祝

釐宣

上功德鴻篇奧冊褒然推首詩初學昌谷昌黎五言力

追漢魏既而導匯百家變化創闢神明獨得制義自荆川震川而下貫串數千篇與古文爲一書法則一本六書自然勁嫵蓋公之學與年進海涵嶽蘊不足喻其所蘊也已亥八月

特旨以公督學福建時珪方典閩試閩人士聞公來無不抃舞珪與公相遇于石門舟次公至閩一以經學六書倡口講指畫示以鄉方閩清某生爲攝令某鍛鍊殺人公發其覆大吏雪之扶持士氣行義若渴重倫節勸懲有加焉暇則搜奇廣洞徧著手蹟明年秋

上以珪代公異數也公題使院之寢曰鞿雅十一月十

八日珪至與公對牀者半月公日則出至他館酬接諸生手不停筆夜歸談盡三鼓復作詩文竟夜珪曰宜少惜精力公不厭也十二月三日送公于芋原舟次公淚下珪曰兄今與伯兄聚比三年珪卽還耳嗚呼孰知其爲永訣耶明年二月復

命

上溫霽詢諭人以爲必嚮用也公素強壯性喜山水于黃山則再登其巔觀雲海于閩之武夷崩玉華諸名勝皆躋撲峻幽從者絜焉六月二十一日夜忽遘痰疾翼日漸瘳二十六日疾復作夜四鼓遂卒公生于雍正

年六月六日丑時年五十有三是月蕭山始祖墓有  
古松高五六丈大風折其末丈餘非偶然也四方之士  
知者痛惜如失所杖公孝友直諒恬淡達觀不愧所學  
在安徽時奏以其官貶贈庶祖妣李氏爲淑人得

旨准行貶贈之廣自此始李太淑人撫視珪者也公書  
來曰我爲子成此志所著古文數百篇古今詩數千首  
他文稱是皆可必傳于後娶王氏

敕封安人晉淑人故分巡道銜加四級寶坻諱詢公女  
子二長錫貞府學生娶候選州同知天津徐君大李女  
次錫庚府學生娶丙戌進士掌廣西道監察御史錢塘

施君學濂女女子五長適候選布政司經歷陽湖龔怡  
次適甲午舉人通州魏紹源三適國子監生大興徐焯  
四適府學生大興翁樹端五待字孫二女孫一俱錫卣  
生乾隆四十七年某月日葬于西山二老莊祖塋之北  
銘曰

導源三江降神鼈陸曰下騰騰名符其實家無長物擁  
經抱書大言炎炎獨出古初羣雅輻湊問奇載酒忘其  
飢渴不啻其口恬于榮利恥于繫援開徑交柯落花無  
言雲海黃鸝天舟武夷謫仙遊戲騎麟不羈颺風何來  
撼我宰才逸枝中披得不抱哭公名在世公神何往嗚

後死吾歸曷放西山之麓先塋之右誌此幽砥千秋  
不朽

詔封奉政大夫林君墓誌銘

君諱正輝字德雲號斗南林姓有元進士某爲閩縣教  
授自莆田遷閩爲縣人後分爲仁義禮智四房君禮房  
支也禮之派不蕃父某因於諸生生四子君爲長十三  
而孤乃傭書養母字其弱弟每夜達旦作書頭目暈欬  
則伏几暫息復書病目眚三年十六始從其父執陳直  
卿學昧爽挾冊往食時暫歸每空腹復入館以帶約其  
腹忍餓讀如故年二十母吳卒貧不克葬柩在破屋中



天大雷雹椽瓦飛裂風撼屋欲拔君率諸弟伏棺號慟  
聲震天竟無恙乃竭厯葬母如禮明年授書于燕園里  
邨童十餘人皆不襪偕其季往季患頭瘍手爲刺櫛日  
則課童蒙夜讀書至四鼓服除乃館于城中三十始入  
學爲諸生君久困僻居人罕知其自來乃書世系于使  
院壁榜下知者乃驚歎某某有子孫也是年始娶妻葛  
葛故貧家女育于舅氏提甕汲水手製通草花賣以助  
食其賢見予竹君兄所作誌銘君自是名漸起授弟子  
益眾教人有法度嘗曰吾無他陰騭事惟不敢誤人子  
弟耳壬午舉于鄉年踰五十矣及子其宴官戶部江南

司主事加二級得

誥封奉政大夫戊戌其宴丁葛宜人憂歸服闋遂侍君  
養不出以是君晚年稍得優游自樂其志辛丑十月二  
十二日以小疾終年七十有一子三其實廩生後君一  
年卒其宴乾隆辛卯科進士戶部江南清吏司主事其  
菜女子一孫二思臺思堂女孫七昔歲癸未予兼攝福  
州府事取其宴第二人試使者不錄予召之署自教之  
甲申冬予以憂去其宴試再罷丁亥乃附縣學庚寅鄉  
試爲予兄竹君所舉遂成進士閩人以予爲知人不知  
老孝廉之蘊蓄者厚矣乾隆四十八年三月四日其宴

遷其母葛宜人柩從君合葬于城北梅柳山之原以其  
實祔請銘銘曰

石錮而璞厥火遏而燎發川堰而瀑達士困而高闕天  
耶人耶無忘矻矻視此銘碣

誥贈奉直大夫鄭蕙園先生墓誌銘

編修鄭君際唐既通籍十六年具摺以修墓請歸得  
旨俞允時乾隆四十有九年夏五月也將行告于珪曰  
際唐生七歲歲乙卯先母林宜人見背越十年甲子乃  
葬越二十有三年丙戌而先考奉直公逝于今十九年  
際唐行老矣不敢以待將合葬吾親敢乞先生銘珪與

際唐同官翰林同直 上書房者九年又以宦游三至  
閩知君家世稍詳不敢辭案狀鄭初籍休寧元末有官  
於福建之懷安諱靖者畱家焉明神宗時析懷安入候  
官世遂爲候官人十一傳至諱開極者順治辛丑進士  
歷官左諭德督學浙江爲名學政珪少讀黃石齋先生  
書公序刻之所爲幾庭先生者也幾庭先生生六子其  
季諱烈字屏麓中康熙辛卯科副榜生四子長諱培字  
樹滋一字蕙園配林兩世皆以際唐官

誥贈奉直大夫翰林院編修加三級幾庭先生有孫二  
十五人奉直公最愛年十五入府學爲諸生屢躋于鄉

試比年四十乃罷去治生計以養父母而課其子獨嚴  
曰吾家名翰林後不可以不讀書時公喪偶有子五人  
遂不娶于居之西偏構眠雨亭爲諸子講業所偕游必  
績學能文者故編修兄弟皆以文名而實學勝公之教  
也先是幾庭先生歿十有八年不克葬屏麓公惄然憂  
之公隱請曰是兒責也獨力營窆窆不以諉諸從父舅  
弟歲丁巳乃葬幾庭先生于梅亭山之陽屏麓公邁疾  
年餘公謹視起居湯藥無間比終喪夢中猶作扶持父  
疾聲醒則哭性好急人之有無待以婚嫁喪葬者甚夥  
其弟曰在豐曰堯曰增先後卒諸孤嫠皆就養于公以

家日落然公性不較銖黍几升斗量衡輒輕入重出  
曰吾非爲名與種德也吾不能爲是瑣瑣者而有市心  
嘗就市市肉屠者誤多與之半歸而覺之急呼屠覆較  
屠以爲求益也大譁公笑曰姑較之較而償其半屠則  
大喜公曰爾儻幾何而堪數誤耶或以公爲大迂其厚  
且直出于性之自然固如是也林宐人考諱和康熙丙  
子科解元贈朝議大夫宐人其次女知書善教子生五  
子曰金簡早卒贈承德郎翰林院編修加二級曰際  
熙乾隆丙子科舉人先公卒曰際唐乾隆庚辰科舉人  
己丑科

賜進士出身翰林院編修加三級直 上書房乾隆丁酉科雲南鄉試正考官庚子科會試同考官曰際乾乾隆丁酉科舉人後公卒曰際雲出爲公弟在豐後孫男二惟敬惟寅女孫七公生康熙戊寅年正月四日戌時卒乾隆丙戌年七月十四日巳時年六十有九林宜人生康熙丁丑年十二月二十三日卒雍正乙卯年四月二十六日年三十有九際唐以甲辰年十二月三日合葬公于羣鹿山之陽林宜人壙左銘曰

梅亭之窠老鳳所殖曾孫翩翩羣鹿之陽厥子麟章考與妣康嘻剖斗折衡而盈其經籛盍徵茲佳城

大名府知府靳君墓誌銘

乾隆甲辰春珪扈從

南巡道出河間晤同年大名守靳君執手而歎曰噫君  
蒼髯盈頰矣蓋自戊辰以來三十七年同榜在者中外  
落落不數人及秋而君卒于官明年春其子師儉走京  
師泣請予銘予旣悲同人之益稀而賢守之不竟其澤  
也不可以辭君諱榮藩字价人號綠溪靳姓山西黎城  
人上世由洪洞來遷高祖妣張及其婦喬孫婦王三世  
俱發號靳門三節君祖綺府學生考尙端雍正甲辰舉  
人官浦江令忻州學正以君官俱



誥封奉政大夫例贈朝議大夫妣溫繼妣盛

誥贈宐人例贈恭人君生左手無名指有附枝穎而嗜  
學年十七試縣府皆冠其曹爲諸生十九舉乾隆甲子  
鄉試乙丑中會試明通榜戊辰成進士辛未丁父憂丁  
丑選廣東瓊山縣以母老改河南新蔡時河南歲禮君  
到官卽究心荒政賑貸必誠民以蘇己卯分校鄉試是  
年珪主試事與君共昕夕者竟月有司坐堂皇判決惟  
意騁輿騶謁戟門一入瑣闥列坐據案擣藍點赤字暈  
苦欲睡予時覘君子衡校纘而察所乙卷無枉歎君之  
學優而心下知其治民之良也庚辰再與分校後以母

愛歸既葬置祭田以祠其宗服除乙酉授直隸龍門縣  
戊子調遷安均車徭爲旂三民七之制己丑陞蔚州知  
州建文蔚書院以教士州西二十五里曰暖泉堡其南  
灘磧夏秋水漲注匯廣靈嘔夷之川盪析田廬歲爲  
患舊築土壩輒圯君行相度易以石爲丈三百一十高  
九尺有奇首尾綴之土壩州人美之曰此靳公隄也君  
不居易之曰保障戊戌擢知遵化直隸州癸卯授大名  
府知府

上知君能其官嚮用矣未期月而病以卒君自縣歷州  
郡官于畿者二十年在所民安之去而思能以經術文

教佐治而本之忠慤庶幾有悃悞遺意持身儉素仕不  
怠學所著吳詩集覽四十卷綠溪詩古文雜著若干種  
生雍正丙午年三月二十五日丑時卒乾隆甲辰年八  
月十九日巳時年五十有九配劉恭人側室任生子一  
師儉附監生某年月日葬于某銘曰  
學之厘吏則循穀于其身以庇而後昆

吏部稽勳司郎中張君墓誌銘

今年二月初張君元禮來就予語別去未半月君喪其  
仲婦又喪其弟癸中旬九日予自西園下直趨弔君君  
嗟然曰舉室遭時疾惟我獨身支持若何予爲排解語

以久出君送之門珍重而別越下旬五日而君以疾卒  
何其迫也比葬有日其孤泣請予銘嗚呼珪何忍銘君  
君諱模字元禮號晴溪順天宛平人其先自江南左興  
遷蓋州衛軍籍當明洪武初至正統四年入衛京師曰  
旺熹宗朝有太僕寺少卿曰邦經疏救楊左罷職爲君  
五世祖考冲之薦舉起家官河南南汝光道妣柴恭人  
君有弟曰桓曰棨君少穎敏九歲南汝公以工部郎謫  
居通州君獨侍讀書自勵年十八入學乾隆壬申春舉  
于鄉秋成進士改庶吉士甲戌散館授刑部主事遇事  
侃侃不阿丙子主湖南鄉試己卯陞員外郎主廣東鄉

夕天卷一 卷之二  
試壬午充順天鄉試同考官奉

命督學廣東時南汝公駐信陽君乘傳謁二親于官所  
明年銓陞吏部稽勳司郎中君之督學也力以振士氣  
爲己任凡士民交訟事不尙媿阿隨有司畸輕重或親  
鞠平反之曰我法司也粵人頗以使者爲能直我而有  
司則疑其侵官曰使者將與我爲難訴之大吏于是君  
遂被劾鐫秩去而南汝公亦以事罷效力軍臺君念父  
齒力衰乃傾貲爲父贖罪得

旨免歸其後雖捐復原官而以父母皆老不就選君兼  
一陰陽家言自喜能奇中又博覽古法書名畫辨器物

賔不爽家食二十年養葬盡禮赴戚友之急若忘其  
貧葬族之殯撫孤弱者教子及弟之子讀書皆成植甲  
辰十月君六十初度作述懷詩六首明年正月與千叟  
宴

賜

御製詩筇杖朝珠如意皮幣十六件君風神不減少壯  
騎控自豪曰吾叟矣初珪年十二識君君娶于寶坻王  
氏于予兄竹君爲妻之姑歲乙酉君來訪予見予次子  
錫緯方七齡能背誦爾雅周禮成帙大喜欲爲婿乃忘  
其輩行結婚姻焉然錫緯年二十有二竟夭折先是君

爲兩老人擇地于城南蕭家邨築室營壙皆秩秩曰他日則祔我于左君生雍正乙巳年十月五日寅時卒于乾隆乙巳年二月二十五日戌時年六十有一子二中正乾隆庚子科舉人議敘八品京官娶井氏中達府學生娶楊氏孫一以仁女五長嫁乙酉科舉人獻縣紀汝佶次嫁獻縣學生鹽課大使紀汝仲次嫁癸卯科舉人寶坻王振緒次嫁珪次子附生朱錫緯次未字孫女四葬于是年五月十一日巳未銘曰

七日不見魂何之千秋吉藏君自爲負丙面壬食坎離從厥考妣芘本枝

湖南布政使司布政使葉君墓誌銘

乾隆甲辰秋珪旣哭吾友辛麓葉君于喪次明年春其子紹樞來謁泣曰先君素心之交無踰先生今將返葬于湖敢乞銘珪不得辭案行述君諱佩蓀字丹穎號辛麓浙之歸安人先世自宋石林公由栝蒼遷湖祖金聲考鳳池俱以君貴

誥贈中憲大夫山西河東兵備道妣巫與陸俱贈蒸人兄弟三人鍾英鍾麟君其季也贈公治刑名館于某縣有盜株逮十餘人獄成矣爲挾其疑白令再讞之果誣也十餘人者皆釋是年陸太夫人實生君六歲而母喪



就學于他姓塾貧不能買書得架止舊書易本義請師  
授讀求其解不得曰吾他日必自得之十六從邑諸生  
吳三錫學制義三錫奇之而贈公以病失館貧甚不能  
具東脯欲君改業泣不何吳曰此子何可不讀書吾將  
挈而就館且飲食之何患焉及君既貴曰吾非吳先生  
不及此苟一日溫飽必與吳氏共湖之人兩賢之年十  
八爲諸生二十庚午舉于鄉時贈公七十有三矣甲戌  
成柱培因榜二甲五名進士分部試主事而贈公卒奔  
喪歸服除試兵部車駕司庚辰授武庫司充順天鄉試  
同考官癸未擢職方司員外郎武選司郎中乙酉京

一等丙戌授河南衛輝知府君能干曹務綜核詳縝  
及爲郡治大小獄懇惻明恕必得其情署開封調南陽  
益以廉潔惠民爲治辛卯卓異引

見擢河東道其

去豫之晉也南陽士民走送者萬人初君與予兄竹君  
同舉進士最相得君時寓居城西南距予家稍遠竹君  
與予同車出雖往城極東北必紆途訪君予方苦苦劬  
每難之而不能挽也故早熟君歲丁亥予司臬湖北見  
君子衛輝及君來河東而予司藩于晉爲同僚又與君  
同年生察君之治河東則真能爲民者乃相得益歡君  
方講求水利疏涑水達五姓湖脩蒲之虞舜廟建書院

教所屬躬行保甲而不擾旌闡節孝不遺幽眚久而益  
勤暇則治易盡取漢唐宋以來諸家傳注及河洛先天  
月卦卦氣變卦反對諸說必索其所以然然後舉而空  
之曰易不在是也乾坎艮震以主陰平內巽離坤兌以  
從陽乎外天之本然也易以乾坤爲體而二氣以乾爲  
元聖道之異乎老釋者乾德也三聖人所言者不可增  
損一字三聖人所未言者吾不敢加著易守四十卷乙  
未戊戌再署按察使兩舉卓異入 覲己亥授山東  
按察使時東撫與書異趨君惓然自守惟盡心于刑之  
中曰吾所得爲者不可撓也辛丑授湖南布政使咸以

頃果得與爲君慶壬寅護湖南巡撫事東撫敗以不先  
舉發吏議當革職奉

旨降補知府君入都請校書萬冊自效癸卯歲除予自  
閩還見君語予曰某于易究心十五六年若可自信矣  
他著錄尙書詩禮經義及詩古文又數十卷其沈思勤  
學而心力亦瘁于是明年得嗽上氣疾予屢就問勸之  
省心養氣君領之竟以九月八日卒嗚呼若君之廉而  
惠在所則民受其益而嗇于年不溥其施豈獨爲君惜  
且悲也君生于雍正辛亥四月二十九日亥時年五十  
有四元配周夫人繼室李夫人晉寧鶴峯先生諱因培

先賢列傳卷之三  
五  
之女有子四紹樞乾隆己亥舉人議敘內閣中書紹棻  
紹樞同榜舉人出後于世父鍾麟紹棻紹本皆監生孫  
二來章含章女三長適太學生錢慎次適太學生沈昌  
培三適編修邱庭澂女孫一某年月日葬于某所銘曰  
陰德在民陽德律身歸復其眞以蔭而子孫

湖北按察使司按察使馮君墓誌銘

馮君均弼既卒之明年秋其子淑奉柩自楚北道京  
師將歸葬于山西泣述其生平而請銘于珪珪早識均  
弼而先兄竹君與均弼交最淡不可辭君馮姓諱廷丞  
均弼其字一字康齋其先由山東壽光遷山西太原振

心衛衛在代州東南遂爲代州人九傳至君曾祖諱璽  
康熙戊辰進士官廣西南寧府同知祖諱光裕康熙辛  
卯舉人官至湖南巡撫考諱祁乾隆丁巳進士翰林院  
編修妣劉淑人生子四君其長也君生而慧嶷幼從瑞  
金楊鴻臚方立游時鴻臚未第以詩古文詞相摩率君  
已嶄然出頭角吐語驚人旣而侍其父入都從山陰周  
蘭坡學士長發讀書獨考證經史地形要害議事風發  
願爲有用之學錢塘周葑岡學士玉章與蘭坡學士同  
直上書房奇君非常人以女妻焉君年弱冠方志于  
古不汲汲遂時趨三試不售以父望之切乃銳力攻舉

子業王申

恩科舉于鄉君亟勤學苦心疾乃從方外游息氣內觀  
豁然元悟心精飛越魔怪百出嬈之不爲動以神力超  
解曰此弄精魂也不竟其學初乾隆元年君以大父官  
貴州布政使

覃恩給從二品蔭生二十一年考列一等引 見奉

旨內用補光祿寺署正歲戊寅編修公游浙卒于杭君  
既迎喪反葬盡以遺產分諸弟于是貧甚服除補官遷  
大理寺寺丞擢刑部廣西司員外郎廣東司郎中家益  
貧賃屋壁立斥輿馬無薪裘資處之淡然日治經史與

名士磋切曰不固竊非士也惟勤于官治讞必求其情  
輒有所平反見知于大司寇諸城劉文正公辛卯 京  
察一等明年出授浙江寧紹台道廉介自矢不爲詭婀  
甲午調福建臺灣道臺灣斗絕海外民番雜詭官三歲  
更番不尙者漁利擾獄市繚蔓不可爬梳君一刷之曰  
吾不爲也寮屬悚惕及君之時不敢爲非巡道兼學政  
君曰不可以媿隅易之親校甲乙士論翕然丙申冬擢  
江西按察使渡海颶作舟膠于山若見檣端有神光柱  
巖者遂得出險旣入 覲到官以失察妄人書籍事  
革職發軍臺效力旋奉



恩旨贖罪

命往江南以同知用庚子

上南巡迎

駕准以道員揭復君在江南六年歷署常州淮安徐州  
三府河庫蘇松督糧松太兵備三道事其在淮安也制  
府委以濬臨河集引河君畫宿工所官吏分寸不敢欺  
或啗以利不可則讒譟交作然大吏之賢者以是益重  
君壬寅冬授分巡江寧鹽法道明年春擢湖北按察使  
陸見

上問官刑部時誰保汝以劉統勳對

上曰學劉統勳最好君子是益感厲淬發思有以自見  
湖北獄善譚張君盡心釐之有楚蜀爭界事君盛夏行  
施南萬山中履勘平其爭遂遭疾請解任竟不起四十  
九年甲辰十一月八日卒于署君生雍正六年戊申九  
月某日年五十有七君有守有爲蹟而復振將有所大  
造于斯民而不竟其施爲可惜也配周淑人子一窳乾  
隆庚子舉人議敘八品京官女一適編修汾陽曹錫齡  
孫一衍緒乾隆五十年乙巳十一月某日葬于代州煙  
旺邨厥考之墓次銘曰

勾注之陽雲龍陰晷何其骨冰雪心鬱奇騰上斬不駸

歸復而升理則謚

日講起居注官翰林院侍講學士加一級裕軒先生墓

誌銘

裕軒先生既葬其門人御史劉君澐告于珪曰吾師之  
化也無怛然其平生用力而自得者不可沒也公知吾  
師者請爲文揭于石珪不可辭先生姓佟氏諱圖轄布  
字裕軒滿洲鑲紅旗人父薩克思哈官寧夏駐防協領  
母隋氏先生其次子也中乾隆辛酉舉人初仕翰林院  
筆帖式戊辰成進士改庶吉士辛未授職檢討歷官侍  
講侍讀充 日講起居注官至侍講學士壬申甲戌

充會試同考官癸酉主四川鄉試庚辰主山東鄉試先生性恬淡方嚮用矣遽引疾乞休

上旋命爲河南學政而先生已前告罷遂不出所居城西南隅曰象坊橋于宅之南闢地數畝藝穀灌蔬曰漫圃出阜城門外十里而近曰釣魚臺隱土山面流築土屋數間曰野圃暇則挈杖獨步往來于是間有造之者不距闕方外有通名理者必謁而請益冀還其眞于釋道兩家言無所不參究晚若有心得其自守廉介雖門生執友不妄受一錢初以似續爲念旣而屏嗜欲與妻恭人偕修白業豫買地西郊種樹環壙築菴于其左曰

我將終于是俾道士守我藏乾隆五十年乙巳正月  
上開千叟宴于是先生年六十有六矣與其兄給事圖

薩布偕與焉拜 賜

御製詩如意筇杖皮幣歸其秋示疾珪將扈

駕木蘭八月朔及朏再踵謁先生笑曰君歸來吾其逝  
矣旣望謂家人曰吾欲暫舍于郊旣出曰吾不反矣作  
書分其遺物于昆弟其妻來問疾趣之歸曰無溷我命  
築茅屋于菴後旣成遷焉趺坐竟日夜不歇二十八日  
平明語其從弟某曰今日吾定逝無動待吾行遠而後  
屬纊焉諸人遙候于戶外靜默無氣逆聲良久端坐如

高侯之息與脈寂矣其定力庶幾涅槃者生于康熙庚子年二月六日癸卯卒于乾隆乙巳年八月乙巳越六日辛亥葬於鐵家墳所著有枝巢詩集四卷先生廉靜淡泊殆於獨者其脫屣榮利超然去來有以也銘曰  
孔取不爲孟思已貴絕利一源勝師十倍上爲昭明惺惺不昧嗚乎先生爾已反其真而我猶嗜醜兮噫

知不足齋文集卷第三